

錢志新編

錢志新編卷十五

雲間張崇懿麗瀛校輯


宋

宋主韓林兒者真定樂城人父曰山童母楊氏至正初流言彌勒佛下生當出明主旣而棗強縣民張氏婦生子甫歲週忽暴長至四尺餘脰腹擁腫見人嘻笑如世所塑布袋羅漢像時至正之九年也於是潁州人劉福通因播言山童實宋徽宗之八世孫當爲中國主遂與杜遵道郁文盛等宰黑牛白馬誓告天地

於十一年五月起兵以紅巾爲號山童旋被擒妻子  
逃匿武安山中未幾福通連拔潁州等數十縣兵勢  
復盛衆至數十萬乃使人求得林兒立以爲主號爲  
小明王建國號爲大宋改元龍鳳都於亳州後遷安  
豐遵母楊氏爲太后以杜遵道爲丞相福通爲平章  
其詔有云虎賁三千直搗幽燕之地龍飛九五重開  
大宋之天凡起兵者皆附麗之會滁陽郭子興卒乃  
招其諸將授子興之子爲帥朱元璋即明太祖爲副元帥  
福通復拔膠萊商等諸路進陷完州直掠大同興和

塞外諸郡旣又陷代郡破興元據鞏昌入鳳翔直抵上都焚宮闕略遼陽至長蘆京師大恐初毛貴旣拔濟南建興賓館選用故官分守要隘更於萊州置屯田三百六十所相距三十里甚有紀綱後貴爲趙君用所殺宋業衰焉至正二十三年張士誠遣將呂珍攻殺福通宋主遣使詣建康告急元璋自將來援未至珍已破安豐宋主走滁州元璋擊走珍迎宋主還建康又三年宋主殂時至正二十六年十月也宋亡立國凡十二年起乙未終丙午

龍鳳錢張端木曰龍鳳通寶錢字文道美銅質如黃金有大小三種



吳

吳主張士誠者小字九四泰州白駒場人與弟士義士德士信以販鹽爲業士誠持重寡言笑多膂力任俠輕財好施至正十三年與諸弟結壯士李伯昇呂珍潘原明等十八人起事不數月得衆數萬遂有泰州興化等六州縣自稱誠王國號周改元天佑復拔揚州通泗等諸路至正十六年攻破平江路卽今蘇州士誠遂都之改稱隆平郡毀承天寺爲王宮擇寺觀豪門爲省院部司所居以李行素爲丞相士德爲平章立



樞密院及宏文館左丞右丞等官復拔抗州嘉興松江湖州常州諸路明年順帝招降之士誠授爵太尉士德授平章士信授行樞密院事以御酒龍衣賜之士誠據地如故惟歲運米一十萬石至京師其地南至紹興北逾江淮直抵濟寧關土日廣且能信用文吏築景賢樓開宏文院以招賢士士亦往往歸焉旋改國號爲吳朝廷徵糧拒而不納東南海運遂絕明兵攻吳江圍姑蘇時士義先病死士德爲徐達所擒不食而死至是士信在城上又爲飛砲中首而死圍

既入城中木石俱盡遂陷士誠願謂其妻劉氏曰吾  
敗且死若曹何爲妻曰必不負君乃積薪齊雲樓下  
呼其羣妾登樓縱火自焚死士誠方欲自縊李伯昇  
抱持之昇至舟中出葑門遂閉目不復食堅臥不起  
至建康太祖問之答曰天日照公不照我命昇至中  
書省夜竟自經死命具棺葬之年四十七時至正二  
十七年也起癸巳終丁未凡十五年

天佑錢按錢述曰士誠改元天佑史誤作祐所鑄之  
錢有小平當三當五三種幕文有篆文一字叁字五



字字極峻整製極精工皆以白銅爲之



天完

天完主徐壽輝者一名真一羅田人嘗爲布賈爲人詛  
緩無能初袁州僧瑩玉以彌勒佛教鼓扇湖湘間從  
者甚衆麻城鄒普勝大倡其術適壽輝浴於鹽塘普  
勝見其身有光異之因與倪文俊等共推爲主以紅  
巾爲號攻破黃州等路壽輝遂稱帝僭國號爲天完  
改元治平後又改天啟天定時至正十一年十月也  
一時螳聚衆號百萬沔陽人陳友諒舉兵應之時丁  
普郎等陷漢陽及興國遂入武昌諸境又陶九等拔



瑞州及饒徽信等州入昱嶺關攻杭州諸路兵勢日盛文俊等建宮室於漢陽迎壽輝居之是年又破常德澧州及衡州岳州文俊謀弑壽輝不果爲友諒所殺友諒遂自稱平章并其軍尋據江西省治壽輝欲徙都江西友諒忌其來不利因謀弑逆時舟師攻太平府挾壽輝以行於采石舟中佯使人詣壽輝白事令壯士持鐵撾自後擊之碎其首壽輝立斃時至正二十年也起辛卯終庚子凡十年

天啟錢劉若愚酌中志曰司鑪庫積有歷代古錢熹

宗一日於御前得天啟錢大小數枚徧問無知者



天定錢此錢有三品以赤銅所鑄字亦精美





漢

漢主陳友諒者沔陽人漁家子也本姓謝祖千一贅於陳因冒姓陳父普才生五子而友諒居第三少多膂力好拳勇伎角爲人有權術嘗作縣吏志抑鬱不樂會徐壽輝等招集亡命往從之爲倪文俊簿書椽尋領兵稱元帥至正十七年文俊欲謀弑壽輝不果奔黃州友諒殺之跨有荆楚自稱平章旋有池州安慶淮南瑞汀吉安撫建諸路遂幽其主壽輝於江州自稱漢王後友諒復得太平乃弑壽輝於采石自立爲

帝國號爲漢改元大義都武昌以鄒普勝爲太師張必爲丞相張定邊爲太尉時至正二十年也二十三年友諒以安慶等諸大郡連被明兵所破乃作大戰艦載眷屬及百官提勁卒六十萬與太祖決戰於康郎山下兵屢挫其弟友仁友貴皆燔死友諒氣大索欲奔武昌追兵至友諒迫啟窗視之流矢貫顙而死年四十四張定邊率羣臣奉其幼子理嗣位載屍奔武昌改元德壽明年太祖招降之授爵歸德侯封友諒父普才爲承恩侯兄友富歸仁伯友直懷恩伯弟

友仁友貴前已死鄱陽乃贈友仁康山王命所司立  
廟祀之友貴祔理居京師久之有言其怨望者太祖  
曰此童孺小過耳恐細人蠱惑不得完朕恩宜處之  
遠方乃與明昇徙高麗遣官護行令高麗王善視之



夏

夏主明玉珍者一名旻隨州人身長八尺目重瞳子以信義爲鄉黨所服歸徐壽輝爲元帥與陳友諒同隸倪文俊部下分守沔陽旋破重慶道出瀘江部將劉澤民曰此閒有劉維周者能文章政事大可任也遂親訪之先一夕楨卽維周名會舉進士夢有冕旒者造廬明晨玉珍至與楨語大悅曰此吾孔明也尊禮備至卽舟中拜理問官進取成都及聞友諒弑壽輝自立乃怒曰友諒與我比肩事漢陽何遽謀逆因不與友諒通



更爲壽輝發喪立廟尋取嘉定破東川盡有蜀地至  
正二十三年稱帝於成都國號爲夏改元天統立妻  
彭氏爲后子昇爲太子用劉楨議倣周制六卿乃立  
冢宰司馬司空司寇司徒宗伯又設翰林院承旨置  
國子監敎公卿之子置提舉司敎生徒府曰刺史州  
曰守縣曰令賦稅十取其一定雅樂立郊社開進士  
科賜董璧等及第又下詔除釋老二氏之敎節儉好  
文蜀人安之有人君之度焉凡立五年殂年三十六  
先是四年冬蜀中星隕如雨旣而玉珍病卒子昇嗣

改元開熙葬玉珍於江水之北號永昌陵廟號太祖  
尊母彭氏爲皇太后以昇年方十歲權同聽政以劉  
楨爲丞相未幾楨卒明太祖伐之乃降封歸義侯賜  
第京師後徙高麗起壬寅終丁未凡六年

天統錢此錢篆文曰天統元寶有二種一種統字在  
左元字在下



錢志新編卷十六



雲間張崇懿麗瀛校輯

明


太祖名元璋字國瑞姓朱氏鳳陽人初爲郭子興部將  
滅漢蜀吳北定中原而有天下在位三十一年改元  
洪武壽七十一起戊申終戊寅按帝以淮右布衣托  
身皇覺及倡大義慨然有救天下安生民之志一時  
豪傑景從定都金陵然後命將四出不數年遂成帝  
業戒母后臨朝禁中官預政其法良美然求治甚急

嫉惡太嚴命金吾射孟子以卿尹授元清立官妓於  
教坊給夫婦之並配何其悖也傳惠宗仁祖仁宗宣  
宗英宗代宗憲宗孝宗武宗世宗穆宗神宗光宗熹  
宗懷宗凡十六主共二百七十七年起戊申終甲申  
大中錢王漁洋池北偶談曰太祖初定天下建國號  
意在大中旣而祈天乃得大明故當時鑄有大中通  
寶錢食貨志曰太祖置寶源局於應天鑄大中通寶  
錢以四百文爲一貫以四十文爲一兩四文爲一錢  
大小凡五等

大中當十錢背文有十字及鄂十濟十豫北平等字




大中當五錢背文有浙豫廣福京等字又有光幕



大中當三錢背文有浙豫廣福京等字又有光幕者



大中當二錢其錢皆光幕



大中小平錢其錢亦光幕居多閒有北平及濟字者











洪武當十錢池北偶談曰太祖卽位改鑄洪武通寶錢亦五等曰當十當五當三當二小平各省設寶泉局與寶源局並鑄洪武四年民間以大錢不便行用復改鑄爲小錢朱竹垞湧幢小品曰日本國明時亦鑄洪武錢若自鑄其國號則錢不能成吳陶宰云明錢有金背火漆之制法金背貴以上號黃銅鑄之地平如鏡火漆賤用低銅鑄以藥涅之黑如鐵背文有




十一兩京十桂十及十福十豫十浙等字又有單十字及光幕者






洪武當五錢其錢背文有五錢五福等字又有光幕者



洪武當三錢其錢背文有三錢及浙字豫字福字而背文桂字者四品之中爲至少又有光幕者爲最多有闊邊狹邊二式



洪武當二錢背文有二錢等字光幕者多



洪武小平錢其錢背文有一錢及桂字福字治字豫字浙字北平等字光幕者多



惠宗名允熾太祖孫懿文太子之長子在位四年改元  
建文起己卯終壬午按帝生而慈惠人心所向而不  
保厥終論者多歸咎於削奪諸藩不知燕王蓄志不  
軌卽不削奪未必不反幸而來朝收之可也乃縱之  
還及靖難兵起命將北征猶曰毋使朕負殺叔父名  
仁矣而實非智也迨金川不守大內灰飛削髮披緇  
傷已然觀影落江湖之句與半邊月兒之呼事有先  
兆者耶或曰宣宗時迎入宮中及殂用王禮葬西山  
建文錢錢述曰建文通寶小平錢汪中書子堅有之

陶宰曰建文錢朱硯山有之



成祖名棣太祖之子篡姪位自立凡二十二年改元永樂起癸未終甲辰壽六十五遷都順天按帝以大風取勝天玉其成燕飛帝畿途歌始驗劉璟謂其百世後逃不得一箇字所幸卽真以後頗多善政第輕於殺戮一人秉忠赤及九族不獨方侍講三尙書亦然而南征北討更無虛日所云三十年殺運未除歟

永樂錢會典曰永樂六年鑄永樂通寶錢九年令於  
浙江福建江西廣東四布政司各鑄永樂錢



仁宗名高熾成祖之子在位一年乙巳歲也改元洪熙  
壽四十八按帝監國時操心慮患已非一朝故登極  
卽出夏元吉於獄咨以國事而御史專責老成科舉  
兼收南北察吏治書姓名感風寒憫將士賜繩糾之  
印赦奸黨之寃斥周訥之諛褒劉儒之節夏稅秋糧

悉行減半征徭撙節官科罷停皆仁政焉雖李時勉之斷助然終不掩其大德也

洪熙錢此錢嘉靖時鑄一百萬錠五千文爲一錠



宣宗名瞻基仁宗之子在位十年改元宣德起丙午終乙卯壽三十八按帝當高煦之變復能保全趙王以篤親親不諱日食不賀騶虞不信異端不親閭寺幽圖織婦訓誠同風何一非盛事乎然張鐙內苑不無



自滿之心而胡后廢戴綸死交南棄論者有遺憾焉  
宣德錢嘉靖時更鑄一百萬錠




英宗名祁鎮宣宗之子在位前後共二十二年改元凡  
二正統十四起丙辰終己巳也先刼帝北去弟郕王  
監國七年帝復卽位改元天順起丁丑終甲申凡八  
年壽三十八按帝初政可觀皆女中堯舜所爲後則  
權盡歸於王振以致蒙塵土木幸中華有主得以生

還後假石亨等奪門之功倉皇復位竟斬少保于謙  
但復辟以來從諫如流知人善任足以稍益前愆矣  
正統錢天順錢嘉靖時補鑄一百萬錠



代宗名祁鈺英宗之弟封郕王奉太后旨卽帝位凡七  
年改元景泰起庚午終丙子壽二十九按帝以監國  
登基一意固守反危爲安功亦不細惟迎復一事未  
見真情忤旨而加酷刑迎附而叨濫賞滿朝皆太保

一部兩尙書何爲者哉迨乾象時在今夕上皇仍居大位而帝亦卽暴崩焉正統初京師旱御巷小兒歌曰雨帝雨帝城隍土地雨若再來還我土地蓋雨帝者與弟城隍者邸王至英宗復辟其言皆驗景泰錢此錢余有之甚精好



憲宗名見深英宗之子在位二十三年改元成化起乙酉終丁未壽四十一按帝崇事兩宮忘易儲之嫌復

于謙之秩甚盛烈也及彭商去位劉萬秉鈞羣小盈  
廷帝心輒改前則敦崇儉約後則百度俱靡惟以汪  
直爲腹心以李孜省僧繼曉爲耳目凡屬直諫並謫  
遠州使天下以言爲諱而羣奄尊沓雖有阿丑詼諧  
懷恩抗直亦不能盡除其黨故君子謂其寵宦官塞  
言路貳異端有三大弊政云

成化錢嘉靖時凡鑄一百萬錠



孝宗名佑檉憲宗之子在位十八年改元弓治起戊申  
終乙丑壽三十六按帝仁孝謙恭與四相從容顧問  
眞一德一心之會也萬尹俱罷卽劉棉花亦不能安  
身而致省伏誅趙鄧並戍使天下知左道之不可亂  
正且與張皇后琴瑟專一終身不近妃嬪尤爲古今  
僅事所可惜者齋醮未盡罷傳奉未盡除修葺未盡  
停宦官未盡斥而鄒智之貶湯劉之戍楊李之獄皆  
非盛世所宜有耳

弓治錢會典曰弓治十六年鑄弓治通寶錢十八年

題準每文重一錢二分



錢志新編卷十七

雲間張崇懿麗瀛校輯

明

武宗名厚煉孝宗之子在位十六年改元正德起丙寅  
終辛巳壽三十一按帝寵任劉瑾入黨並起雖有以  
死報國之韓文猶不能勝奄宦之勢伴食中書何益  
哉迨瑾禍甫消帝忽欲自稱爲威武大將軍太師鎮  
國公朱壽巡邊徧觀宇內滿朝死諫概皆杖斥雖駕  
不果行亦大損國體矣宸濠肆叛賴王守仁起兵元

凶就縛帝復假此出巡久駐南京及豹房大漸乃曰  
前此皆由朕誤晚矣

正德錢會典曰正德五年命將洪武永樂洪熙宣德  
弘治與歷代大錢相兼行使審是則仁宗亦曾鑄錢  
世獨寡有正德小平錢光幕外有一品幕文作龍戲  
珠形者爲真錢餘均僞作故皆不錄



世宗名厚燠武宗從弟興獻王之子在位四十五年改



元嘉靖起壬午終丙寅壽六十按帝奉詔至京久旱  
忽雨識者知爲中興之兆嗣位議禮舉朝沸騰而張  
璉桂萼輩遂乘機干進逞私創議進號配天尤可異  
者自號長生聖智帝君一任嚴嵩父子招權納賄黨  
惡爲奸致夏言曾銑楊繼盛諸公俱罹慘死二王不  
見薄於父子西苑不返薄於夫婦徒信方士卒殞厥  
身四十五年之間其過不鮮也

大明錢會典曰嘉靖六年令曉諭京城內外收積新  
錢限一月內盡數赴府縣及兵馬司具呈戶部照銅


價給發價銀新錢卽銷化候大明通寶錢取用食貨  
志曰每文重一錢三分



嘉靖當十錢會典曰嘉靖十三年命工部造嘉靖通  
寶錢依洪武折二當三當五當十式各三萬文續解  
貯庫陶宰曰所鑄至少今世罕觀惟當十一種存世  
差多會典又曰嘉靖二十年令照新式鑄洪武以下  
至正德九號錢每號一百萬錠五千文爲一錠




嘉靖當五錢此錢銅質如黃金字文獨秀整



嘉靖當三錢



嘉靖折二錢光幕者有之有字者從未之見



嘉靖小平錢此錢亦惟光幕一種



穆宗名載堉世宗之子在位六年改元隆慶起丁卯終壬申壽三十六按帝甫立卽釋海瑞於獄中舉直也贈王守仁爵報功也賜楊繼盛諡旌忠也戊鄢懋卿等錯枉也凡先朝建言諸臣生者錄用死者優恤開言路也帝之諸政誠甚美矣乃廷杖石星禁錮李芳內官殺人誣以反坐其失德又何多歟所以天開地陷男化爲女栗生桃李紛紛告異也


隆慶錢會典曰隆慶四年鑄隆慶通寶錢仍令以新鑄者送戶部發太倉庫量放京官折俸日知錄曰嘉

靖錢最爲精工而隆慶萬曆更加重半銖



神宗名翊鈞穆宗之子在位四十八年改元萬曆起癸酉終庚申壽五十八按帝十齡踐祚政在江陵起海瑞爲御史用李成梁戚繼光爲總兵知楊時喬李廷機不受書帕王錫爵于慎行等共濟時艱其政卓然後旋溺志宮闈遲留建儲妖書挺擊幾不全慈孝之恩而好逸好疑諫疏一概留中礦稅紛紛四出東林

浙黨水火紛爭不可救藥也惟復建文年號爲善耳  
萬厯錢食貨志曰萬厯四年命戶工兩部准嘉靖錢  
式鑄萬厯通寶金背錢及火漆錢四火黃銅爲金背  
二火黃銅爲火漆又鑄旋邊錢尋命十三布政司皆  
開局以五銖錢爲准會典云萬厯制錢遵照欽依金  
背八文准銀一分火漆錢邊各十二文准銀一分有  
龔惡者罪之又有一品大小如折二錢字極板滯而  
會典諸書俱未載今世頗多又小平錢光幕外背上  
有天字公字及一圓圈者



光宗名常洛神宗之子在位未期改元泰昌實卽萬厯之四十九年辛酉歲也壽三十九按帝旣卽位停止礦稅發帑犒邊急先務也封建諸王復爵王舅親親厚矣起先帝所斥言官許相臣內外並用登極未匝月善政不勝書而忽以女婢之御而致疾紅丸之進



而賓天選侍可灼之罪其可逭哉

泰昌錢食貨志曰天啟元年帝仰思泰昌年號尙未鑄錢遂命分鑄與天啟錢並行




熹宗名由校光宗之子在位七年改元天啟起辛酉終丁卯壽二十三按帝在御內外惟知魏忠賢不知有帝而奉聖夫人客氏又以妖冶之姿表裏爲奸勢全羶附一時忠良戮辱幾盡吳懷賢等斃於杖下周宗

金元考  
建等斃於獄中逮高攀龍有溺池之慘逮周順昌致  
五人之變女子小人不道若此而又加恩三等弟姪  
俱廕迨彌留之際尙眷眷以任忠賢爲囑其可謂至  
死不悟者也

天啟大錢食貨志曰天啟元年王象乾請鑄當十當  
百當千大錢用龍文略仿白金三品之制於是兩京  
皆鑄大錢而民間不便於行其後有言大錢之弊者  
乃詔南京且行停鑄且收所鑄大錢發與各局仍改  
鑄小平錢按天啟通寶大錢背文有十一兩及鎮十

十一兩密字府字十字又有光幕與對文者





天啟小平錢光幕外背文有新一錢一分工字戶字

院字浙字云字一錢二分字折二錢則惟一星文




懷宗名山檢熹宗之弟初封信王在位十七年改元崇禎起戊辰終甲申李自成攻破京師帝以髮被面自經於煤山壽三十五按帝初卽位而聲色不形立除逆璫實智勇深沉且敬天勤民虛懷納諫宵衣旰食

何以加焉第因濱生猜緣激成愎然非盡帝過耳要之神祖倦勤熹宗曠元氣潛消盜賊如張李更多慘殺之殃以致民不聊生迨彰義門啟帝卽殉節西山烈也與社稷俱盡義也書襟垂諭勿傷百姓仁也帝豈與古亡國之君可同日語哉


崇禎錢食貨志曰崇禎元年所鑄崇禎錢以五十五文當銀一錢定錢式每文重一錢南都每文重八分初制歷代錢與制錢通行至是始括古錢以充廢銅民間市易亦輒不用蓋自隋世盡銷古錢至又再銷

存世蓋無幾矣

崇禎當十錢較天啟十一兩大錢微小而略薄皆光  
幕者




崇禎當五錢背文穿之左右有戶五監五等字皆以  
青銅爲之折二錢背文穿左有一二字及穿上一星  
文者



崇禎小平錢此錢光幕外背文多至數十種單文有戶工重應府貴廣局榆戊青汧已新日季官捌思等字雙文有太平清忠奉制戶川戶日八禾一禾等字不可枚舉茲難悉錄略圖四五品



崇禎馬錢乃崇禎季年所鑄後弓光卒用馬士英爲



相而亡或曰門下有馬是爲闖賊之兆其馬皆在穿  
下作跑形俗云跑馬崇禎可以治難產催生



錢志新編卷十八

雲間張崇懿麗瀛校輯

明末諸王

應天

福王名由崧神宗第三子福恭王常洵之長子崇禎十六年嗣封福王甲申三月京師失守四月凶問至南京參贊兵部尙書史可法等迎立爲帝改元弘光以高宏圖史可法馬士英等爲東閣大學士可法旋自請督師江北詔以便宜行事各鎮並聽節制封吳三


桂爲薊國公鄭芝龍爲南安伯黃得功爲靖南伯時  
士英柄國薦用其黨阮大鍼等用事一時正人君子  
各乞休去士英等賣官鬻爵甚至府縣童生應試上  
戶納銀六兩中戶四兩下戶三兩以助軍餉竟赴試  
院利之所在搜括殆盡人爲語曰中書隨地有都督  
滿街走監紀多於羊職方賤如狗陰起千年塵拔貢  
一呈首埽盡江南錢填塞馬家口而王唯深居禁中  
日與宦伶串戲飲火酒縱淫幼女爲樂故太子至南  
京王不相認敕法司勘問備極五毒囚獄中時

大清兵渡淮猝至揚州福王與士英皆遁去次日至城  
下百姓捧太子出降至營豫王離席迎之坐於已右  
有頃擒劉良佐至叩首請擒福王贖罪乃追獲之挾  
之見豫王王薄之坐太子於其上問何磨滅之狀福  
王甚愧江浙既定俱隨北去時乙酉五月二十五日  
也後唐王立於福州乃遙尊福王爲安聖皇帝

弘光折二錢背文有一貳字



弘光小平錢光幕外又有恩字戶字工字及星文再  
 一種有鳳字者字帶隸體乃馬士英總督鳳陽時亦  
 曾開局鑄錢以鳳字別之按鄒漪遺聞曰甲申十月  
 初一日福王命鑄弘光錢



福建


唐王名聿鍵太祖九世孫祖端王欲立其愛子囚世子  
器盛於承奉司王從之崇禎五年襲位九年復廢爲  
庶人福王時赦出徙居廣西平樂府福王北去王適  
至杭鄭鴻逵等奉王入閩稱監國閏六月丁未自立  
於福州陞爲天興府立妃曾氏爲皇后改元隆武進  
鄭芝龍等爲侯以黃道周蘇觀生等爲東閣大學士  
愛芝龍子鄭森材賜國姓改名成功提督禁旅用駙  
馬都尉行事按王好讀書博通典故手撰三詔與魯

監國書皆羣臣莫能及開儲賢館定十二科取士以觀生領之兵餉戰守俱芝龍爲政撫按以下皆捐俸助餉又有紳助大戶助又借徵次年錢糧察括府縣庫積又大驚官爵部司價銀三百兩後減至百兩武劄僅數十兩倡優廝隸盡列衣冠旣而大學士黃道周募兵至徽州被執至江寧不屈死

大清兵過嶺隆武載書數十車奔至順昌將謀入贛王與妃曾氏俱被執妃至九瀧投水死王械至福州死之永明王立遙尊爲思文皇帝時順治三年八月二



十一日也初士英大鉞等擁殘兵數千請入關王以其罪不許士英計窮至台州山寺爲僧大鉞迎降後因在順昌獲龍扛搜得士英大鉞等連名疏請隆武出關爲內應疏大鉞聞信知不免乃投崖死仍命戮尸士英等四人駢斬於延平城下家口悉給兵丁隆武錢有二種大錢光幕小錢背有戶字工字及星文



小唐王名聿鏐隆武之弟順治三年十一月浮海至廣州故相蘇觀生等擁立之改元紹武十二月十五日總兵李成棟兵薄廣州王被擒與周王益王遼王俱被殺蘇觀生自縊死祭酒梁朝鐘太僕霍子衡等死之何吾騶等皆降錢謙曰紹武通寶行書小平錢乃唐王鑄世獨未之見



浙江

魯王名以海太祖九世孫魯肅王壽鏞子初避難在台  
州乙酉六月原任山西僉事鄭之尹子鄭遵謙同張  
四維方國安等迎立王爲監國於紹興與

大清跨江相距屢戰不勝又與閩中如冰火迭殺使者  
遵謙攜貲入海時馬士英依棲國安因謀以魯王投  
降爲入關計乃威逼王南行使兵守之守者病王得  
脫登海舶遁入舟山時丙戌六月十八日也故相張  
四維從容赴園池死兵部尙書陳函輝自經禮部侍

郎王思任不食死原任大學士朱大典合門焚死大  
學士蔣德璟按臣鄭爲虹禮部尙書曹學佺通政司  
馬思理等皆不屈死之

大明錢此錢背文有戶字工字帥字與嘉靖時鑄大  
明錢形製不同



廣東

永明王名由榔神宗孫桂恭王常瀛之少子初封衡陽  
以寇亂徙寓梧州兩廣總督丁魁楚廣西巡撫瞿式  
耜迎至肇慶於丙戌十月十四日稱監國改元永曆  
以魁楚式耜爲大學士總兵李成棟兵薄城下王西  
避梧州魁楚失去又奔武岡柳州戊子四月復自桂  
抵南寧成棟反歸王奄有兩粵之地己丑二月成棟  
歿於陣又抵梧州庚寅十一月梧城大亂沿途如沸  
式耜衣冠危坐署中適總督張同敞

故相文忠公孫  
崇禎時磨都督

東來見式耜曰事迫矣公將奈何式耜曰封疆之臣  
當殉封疆同敞曰公言是君恩師義敞當共之遂笑  
與相飲厥明被執定南王孔有德命幽之別室二人  
賦詩相廣和至閏十一月十七日斬之是日雷電大  
發同敞首躍起而前者三難地丈餘眾皆辟易永厯  
奔南寧入土州嚴起恒等隨行十六年正月三日李  
定國兵敗於潞江王走南甸覓舟隨行者六百餘人  
陸行者自岷王子而下九百餘人五月八日王至赭  
經始知陸行者盡被緬人掠爲奴多自殺惟岷王子

等八十餘人流入暹羅定國等屢以兵攻緬索王不  
得十二月

大清兵臨緬緬人以永明王父子送軍前明年夏四月  
二十五日死於雲南六月李定國卒於猛臘

大  
永曆大錢背文穿上下有壹分二字一品止當五錢





永歷當五錢背文穿上下有五釐二字




永歷小平錢背文有留輔部國戶工明督及二釐等字又有光幕一種<sub>叔</sub>字者字仿隸體



永祿折二錢其錢皆光幕







又一種永曆通寶錢大小如折二錢有篆文及行書形質不類明錢相傳爲嘉靖中島寇汪直所鑄未究是否故卽附此以俟博雅



附

李自成米脂人父守忠禱子於華山夢神以破軍星爲  
之子遂生自成性狡黠凶暴善走能騎射旋爲盜魁  
崇禎末遂僭號大順改元永昌據西安秦府爲宮後  
爲吳三桂連敗自成奔至羅公山爲鄉人碎首而死  
按永昌大錢當白金一兩次當百錢小平錢皆光幕





張獻忠膚施人爲人陰謀多智殘忍慘酷初從王嘉允  
作亂崇禎十七年據成都僭號大西改元大順後獻  
忠聞 肅王兵至登鳳皇山望之猝遇一矢而殪或  
云獻忠見自成敗逡巡不敢復出以病死於蜀中鑄  
有大順錢又有興朝錢三種乃其養子可望所鑄



錢志新編卷十九


雲間張崇懿麗瀛校輯

安南

安南國古稱交趾卽日南西北自交岡而來故曰交趾  
其地東至海西界雲南南界占城北界廣西東北界  
廣東廣一千七百六十里袤二千八百里自唐堯時  
命義叔宅南交平秩南訛周有越裳氏重三譯來朝  
宋祥符中其王黎至忠爲大校李公蘊所逐僭號大  
越皇帝改元寶象淳熙元年封公蘊孫爲安南國王

安南之稱國始此至明宣德初復爲黎氏所有其國  
度分十三道五十二府二百十九州縣所至皆設學  
校文人頗嗜古弄柔翰彬彬有華風三年一大比初  
試經義次試四六三試詩四試策論會試進士無定  
額其氏族如阮裴吳楊陶黃武宋陳程梁胡之屬外  
無他姓其地皆淨沙雖跣足無垢其物產多稻無麥  
重蠶桑其用官內設閣部卿寺翰苑科道獨御史臺  
最重外設承政憲司藩臬郡縣各有正佐非科甲不  
得膺京官武職內有五軍都督府各領一軍不相統

屬外有提督留守多以世襲五等爵充之其俗喜以藥染齒使黑而有光無陰晴皆戴笠見貴人及長者以脫笠爲敬衣大領之衣色尙白草木四時皆不凋晝夜無長短稱貴顯曰翁茶翁茶者大官也其大貴者有轎似車上轎盤足坐或用八人及四人擡之黎利諡曰太祖在位六年改元順天起宣德二年丁未終宣德八年癸丑





黎麟一名龍諡曰太宗黎利之子在位九年改元凡二

紹平六大寶三起甲寅終壬戌




黎濬一名隆基諡曰仁宗黎麟之子在位十七年改元

凡二大和

史誤作大利

十一延寧六起癸亥終己卯爲庶

兄黎琮所弑



黎琮號爲厲德侯纂立九月改元天興卽延寧六年也



黎灝一名思誠諡曰聖宗黎濬之弟在位三十八年改

元凡二光順十洪德二十八起庚辰終丁巳



黎暉一名鎬諡曰憲宗黎灝之子在位七年改元景統

起戊午終甲子



黎誼一名璿諡曰威穆帝黎暉之子在位四年改元端慶起乙丑終戊辰爲臣下所逼而卒



黎暉一名澄諡曰襄靖帝黎灝之孫在位七年改元洪順起己巳終乙亥爲權臣陳嵩等所弑貶爲靈隱王大臣阮宏裕等討嵩誅之立其兄之子諱爲主



黎諲閔之姪在位五年改元文治一作交治起丙子終庚辰  
爲權臣莫登庸所逼徙居清華卒



黎寧諲之子立五年改元元和爲登庸所攻竄占城弟  
憲立改元光紹凡十五年廉知寧所在乃迎歸清華  
寧卒又五傳而明亡



附

按莫登庸逐其主篡立凡四年改元明德傳子方瀛改元大正三傳至茂洽黎氏漸強茂洽但保高平一郡四州在北隅之東無城郭以後俱無考



# 高麗

高麗國屬禹冀州之地本箕子封國號朝鮮後爲夫餘  
別種朱蒙居之始建國號高句驪以高爲氏都曰平  
壤城其地東西二千里南北一千五百里後闢土益  
廣合新羅百濟爲一東南至六千里以新羅爲東京  
百濟爲南京平壤爲西京凡三京四府八牧郡四十  
二州一百十八縣三百九十鎮三千七百洲島官凡  
十二級國分五部曰內部及東西南北四部民呼王  
曰聖上私謂曰嚴公后妃曰宮主士以族望相高以

柳崔金李四姓爲首無宦者用世族子爲內侍尙釋  
教見尊者則跪應必唯以趨爲敬立各反拱行各搖  
手拜則曳一腳父母及夫喪服三年兄弟三月殯於  
家三年而後葬初以米布貿易不知鑄錢後始學鼓  
鑄其文曰東國通寶東國重寶海東通寶海東重寶  
三韓通寶然其俗不甚行也徐兢高麗圖經曰廣化  
門東南卽鑄錢監也他貨皆以物交易唯市藥則錢  
海東錢雞林類事曰海東錢有通寶重寶之文有眞  
行篆三種制作頗精並徑九分重三銖六參

東國錢有通寶重寶之文泉志曰徑寸重三銖四參





朝鮮錢按朝鮮自晉永嘉末陷入高麗至洪武初李成桂篡立遣使朝貢詔以高麗仍號朝鮮則朝鮮錢當是洪永以後之錢也而今所有者色甚古





日本


日本國在東海之東與儋耳相近去中國一萬二千里  
水陸凡三千里地方古稱倭奴國唐時始習夏音惡  
其稱以近日所出乃更名日本自謂泰伯之後其王  
以天爲兄以日爲弟俗好文字重儒雅知卜筮尙浮  
屠法官有十二等以大小德仁義禮智信爲紀人多  
壽考地膏腴氣溫暖五穀獨無黍交易用銅錢文曰  
乾文大寶其王皆以院稱有掘河院烏羽院後鳥羽  
院龜山院一條院二條院冷泉院嵯峨院朱雀院高

倉院四條院深草院後深草院土御門院等號皆曰  
天王大抵宋元以來之稱也所鑄有和同開珍神功  
開珍萬年通寶隆平永寶皆徑寸重五銖隸書又有  
慶長寬永長德久安正元等錢

稊同錢此錢今所存者稊字只作和回文讀同字在  
左泉志曰徑一寸重五銖




神功錢此錢今所存者作開寶功字在左亦回文讀



慶長錢寬永錢朱竹垞東鑑跋云日本慶長十年卽  
明萬歷之三十二年寬永二年卽明天啓二年又徐  
太史中山傳信錄云琉球奉日本正朔亦鑄寬永錢  
幕文有文字製最精妙又有光幕及佐仇仙長足小  
元久等字者皆不及也




延喜錢長德錢久安錢正元錢四種諸書皆云日本  
國所鑄光幕



# 高昌

高昌國卽漢車師前王庭也其地出赤鹽如硃白鹽如玉多蒲萄酒至其國從武威西北有捷徑度沙磧千餘里可到其所鑄之錢文曰高昌吉利唐貞觀中命侯君集等討滅之俘其君智盛以歸盛弟湛有子昭好學嗜書頗工文藝得時名焉又宋太平興國中王延德使其國及還敘水程以獻其地出礪石剖之得寶鐵謂之喫鐵石鷗鷺鳬雁之類極多地甚熱每盛暑人穿地穴以居飛鳥羣萃河濱或飛起卽爲日氣

所鑄而死泉寶錄曰高昌錢光幕錢極厚重乃高昌  
國所鑄未知出於何代




錢志新編卷二十

雲間張崇懿麗瀛校輯

無考古錢

鎖子錢洪氏泉志曰徑一寸五分重七銖穿正圓無輪郭如半兩之狀李孝美曰此錢銅色純赤俗稱爲鎖子錢又曰神農錢一品方穿






大泉五銖背有星月文疑出五季以後




平當五銖洪志曰徑九分重三銖肉郭夷坦當字湮漫



續銖舊譜曰形製頗類五銖其文左曰續右曰銖



明月錢洪氏泉志曰此錢徑九分重四銖二參製作鏤  
薄形質簡古外無輪郭背文明微



異文錢洪志及孝美曰此錢徑寸二分重十銖面有二  
字不可識肉好有周郭背夷漫如半兩又一品徑寸  
文稍異或曰是遼夷書天贊二字



大治錢文曰大治通寶大治二字楷書通寶二字隸體



皇元錢景元錢文皆曰通寶形製相類



開和開定二錢色甚古文皆曰通寶字仿開元體甚肖



保泰錢泰德錢文皆曰通寶楷書背上有星文



金圓世寶錢此錢字帶八分書銅色赤疑是外夷所鑄



永盛錢文曰通寶幕文穿右有一巳字



隆基錢文曰隆基通寶楷書光幕



明定錢文曰宋寶明定二字楷書宋字篆文寶字八分



昭統錢文曰通寶背文穿下有中字正字又見光幕者



元平錢政平錢文皆曰通寶楷書光幕銅色甚舊



寧民錢建國錢文亦皆通寶楷書寧民錢寶字作宝



平安錢此錢平字楷文安字行書通寶二字則隸體



大世錢世高錢楷書大世二字甚闊大通寶二字小



永壽錢文曰通寶有真行書二種精工者甚少




元聰錢文曰遵寶光幕元寶二字隸體聰遵二字草書



福平紹符二錢篆文皆曰元寶以赤銅爲之光幕



寶永錢楷書文曰通寶製特精好銅質字畫逼肖寬永



仙臺錢此錢輪郭俱帶方皆鐵鑄字亦細整肖寬永





盛德錢楷書文曰盛德通寶字極工緻



宣觀錢其錢宣字則篆文觀通寶三字精好逼肖大觀



廣和錢此錢篆文曰廣和通寶以赤銅爲之



郭字錢此錢輪郭好穿左一郭字右一字如花押光幕




崇明錢文曰崇明通寶楷書寶字帶隸體




景興錢此錢隸篆皆曰通寶真行書則有巨寶永寶重寶泉寶順寶內寶之寶大寶等字背文有山南山西及中工京三字者又有穿左右作二夷書者不能悉

錄略圖數種於右



藕心錢泉志曰此錢有四種有重一兩三錢者有重一兩二錢者有重一兩者及重二錢半者特大者少而小者多據賈客云俱是俄羅斯及回部混入中國



蟻鼻錢此錢上狹下廣背平面凸長七分闊三分重十二銖汴中頗多未詳何代之物

馬錢




龍媒錢此錢半面作馬形半面左右有龍媒二字蓋良馬之名也重二錢方孔在馬腹之中



拳毛錢陸南軒曰拳毛馬代宗賜郭子儀者故稱令公馬錢一面作馬形一面上下拳毛二字圓穿



望雲錢陸南軒曰望雲言馳驟之速可日行千里也一面作跑馬之形上下有望雲二字一面光幕方穿



長鳧錢一面作馬形一面左右有長鳧二字方穿



汗血錢續泉志曰此錢一面爲馬形一面左右有汗血二字乃漢時大宛良馬之名重二錢方穿




魚目錢此錢一面作馬形一面有魚目二字又有對文



飛黃錢此錢兩面皆作馬形上下有飛黃二字按飛黃卽毛詩之乘黃也方穿



烏騅錢一面作馬形一面光幕圓穿重輪俗稱霸王錢  
又名烏騅錢在馬錢中最薄小重只七分



### 壓勝錢

陰陽神靈錢明朝小史云英宗北狩時每筮決於山西  
全寅屢驗及復位召官之辭不受乃鑄陰陽神靈錢




十萬賜之字畫柄齒重二錢有二種



五兩大布錢背文有龜蛇星劍及雙劍人物等形不一



雙鳳錢泉志曰徑寸二分重六銖輪郭厚重光幕



龍鳳錢此錢徑九分重三銖九參面作龍鳳之象背有  
四人各執刀楯之狀




雙魚錢泉志曰此錢徑九分重四銖五參面文爲龍鳳  
盤繞之形背有雙魚相向




日有萬陪錢陸南軒曰一面作權黃白之象而稱鍾中

有一意字蓋取稱心隨意而已一面日有萬陪四字



軒轅錢顧烜曰此錢徑一寸重五銖而文爲北斗軒轅之象背爲龍鳳矛盾之形俗謂之北斗星錢



田蠶萬倍錢此錢一面田蠶萬倍四字一面作鹿形蓋亦取祿在其中之意重一錢九分



永安五男錢李孝美曰徑寸二分背面皆四出粟文面  
永安五三字篆文男字真書背有生肖等形不一



天下太平錢李孝美曰此錢大小不等有徑寸重六銖  
有徑八分重五銖者背文有作四人持兵之象又有

水浪紋及九子之形面皆曰天下太平



又一種一面左右列二人下有犬上有日雲之狀一面左右夷漫似人形上有花朵下有若鑪者色甚舊



曩余受業外舅錢笥峯先生之門會張  
麗瀛先生課諸內弟得以昕夕親炙見  
其摩娑古泉鎮日不釋手間有模糊殘  
缺者輒再三易必至完好乃已故其泉  
盜然古色而字跡皎若列眉心竊好之  
嗣後余侍家君宦遊浙粵越數歲旋里  
先生以所著泉志新編示余余受而讀  
之見其體例一新考訂多前人所未及

亟請付梓而先生以乏資辭余乃力肩  
其任先生遂將所藏古泉悉以畀余夫  
乃嘆先生之高誼能爲知己者割愛也  
閱半載鐫版告成余維古今泉譜不下  
數十種而皆遵洪志之例專爲泉考耳  
此譜考證詳核余尤愛其以年號泉爲  
主泉更係其君之世系朝事俾閱者於  
主德之賢否政治之蠹稗上下千古瞭

如指掌直謂之泉史可也豈徒作玩好  
觀耶至若壓勝等品概從其畧弗矜奇  
異益見謹嚴而其圖尤精美與本錢無  
累黍差蓋以先生素精篆隸擅鐫筆習  
繪事故也較繕泉志之侈口自誇紕繆  
不一而足者奚啻霄壤哉願海內同好  
者共珍之時

道光庚寅夏五古婁尹湘式伊甫跋於



聽香斗室